


Als. e. schreyb also in sein fierung / reiß ein zwerch lini. e. f. mitten durch. a. b. c. d. Darnach zeuch des bustaben ersten breytten aufrechten strich / foren zu gleicher weys wie im. d. beschriben. Darnach zeuch des bustabens obersten dünnen zwerch strich vnder der lini. a. b. das sein ent sechs zehenteyl minder eins drittel / von einẽ zehẽ teyl erreich / vñ die auffschweyffung dieses strichs mach vnder sich am ende eyn zehen teyl von. a. b. breyt / vnd des cirkelriß Diameter damit die außnehmung geschicht / mach eyn zehen teyl breyt von. a. b. Darnach mach den mittleren dünnen zwerch zug mittẽ auf der lini. e. f. dz er ein zehenteyl von der leng. a. b. kürzer sey dan der ober zug / vñ mach in am ende zwey mal so breyt als den oberen / vñ schweyff in oben vñ vnden auß mit einem cirkelriß des Diameter hab eyn sechs teyl von. e. f. aber den vndersten dünnen zwerch strich ob der lini. c. d. mach das er furdret mit seinem vndersten eck den obersten zwerch zug eyn zehenteyl von der leng. c. d. vnd den spitzschweyff noch weyter hinauß zwen drittel von eynem zehẽteyl / vñ zeuch in ober sich eyn sechsteyl von der leng. c. d. vnd schweyff in mit einem cirkel auß / des halben Diameter eyn sechsteyl von. c. d. hab. Item den vndersten winckel im bustabens hõle auß mit einem cirkelriß von der gros / damit der mitler zwerch strich auß geschweyfft ist / die anderen winckel laß scharpf beleyben. Wie das hernach ist außgerissen.



Item das. f. mach zu gleicher weys wie das. e. allein den vndersten zwerch strich laß außsen vnd schweyff den bustabens vnden auf einer seyten auß / wie vor auß der anderen. Wie ich das hernach hab außgerissen.

